

# Rapport annual 2015

---

All'entschatta digl onn 2015 muntava igl inventari dalla Biblioteca Trun sin 5416 medias alla fin digl onn sin 5822. La biblioteca ei stada aviarta 172 dis. Duront quei temps han rodund 1370 personas visitau la Biblioteca Trun ed han empristau varga 4300 medias.

Il 25 d'avrel havein astgau prender part alla fiasta commemorativa da Tista Murk organisada dalla Ligia Romontscha. Tista Murk ei staus els onns 1980 in dils iniziants dalla Biblioteca Trun. David Flepp ha menau in forum da discussiun cun convischins da Trun che enconuschevan Tista Murk sco vischin, scolast, reschisur da teater ni confundatur dalla Biblioteca Trun. Il hospis han era saviu raquintar d'in ni l'auter eveniment persunal cun Tista Murk. Biebein trenta personas han visitau quell' occurrenza en biblioteca che ha giu liug sco preact festiv. Allas 20.00 uras ha igl act festiv entschiet en sala da cultura dalla casa da scola Trun.

Era igl onn 2015 havein postau nossas truccas da cudischs per ils bauns da leger; ina a Carmanera, ina silla senda d'art spel Rein (niev) maneivel dalla stalla Livers e l'otra a Davaruns (Schlans). Quella purschida offerin naven dil matg tochen igl october. In ni l'auter cudisch anfla magari pér puspei el decuors digl unviern la via anavos en biblioteca.

Il scolars dil Consorzi da scola Sumvitg/Trun han la pusseivladad da visitar la biblioteca cun lur scolats duront il temps da scola. Nus bibliotecaras sespruein da porscher ad els lectura che fa plascher da leger. Els san era profitar dil portal online dad Antolin. Uonn havein era giu viseta da scolars dalla Casa Depuoz.

La cumissiun da bibliotecas GR ha proponiu per l'jamna bibliotecara dil settember dad envidar commembers dil Cussegl Grond ad ina viseta en las bibliotecas. Cunquei ch'il convischin Curdin Tuor da Trun ei suppleant deputau dil Cussegl Grond havein envidau en el. Cun grond tschaffen ha el dau suatientscha a nossa damonda. Curdin ei bab da dus affons pigns ed el ei sedeclaraus prompts da raquintar la historia dal « Sgol da Marmottin » a nos pli pigns visitaders. Il pignets, mo era geniturs, tattas e tats han tedlau cun buccas aviartas. Silsunter essan stai da cumpignia cun magliar petta e beiber sirup ni caffè.

Lesen.GR porscha a scolas la pusseivladad d'organisar auturs a preleger ni per in luvratori. La 3. classa dil scalem superiuor cun lur scolast, Armon Bearth, han dumandau dad envidar la giuvna Daniela Dill per duas uras en biblioteca. La giuvna da Basilea ei actura da poetry-slam. Il scolars han astgau experimentar cun plaids, expressiuns e mimica. Els ein stai engaschai ed han giu tschaffen da far quella experientscha.

Il 13 da november 2015 ha giu liug la notg da raquents Svizra cun il motto « Strias e giats ners ». Per quella occurrenza havein envidau Hubert Giger dalla Val Medel a preleger ord siu roman historic « La stria da Dentervals » digl onn 2011. El ha dau suatientscha a nies invit e nus havein astgau tedlar cun grond interess sias raquintaziuns dalla persecuziun da strias. Il publicum ei staus fetg interessaus. Silsunter havein offeriu in pushegn.

Per la Biblioteca Trun: *Olivia Pfister-Tgetgel, caubibliotecara*